


Chi rbi bni



Chi laa dxi rgaa cui bni lo junynií, per riabiallga bin lo yu ta donnuu gu na lon güen ta cui bni lon. Chií rní tu binguiiw lo chélnii:

—Oi, naa chabiia lo yu ta donnuu gu nan güen ta cuuequynu bni.

Chií rní chélba:

—Yo, wi guabiia.

Chií rnazba zeba. Ni zeba laa tu bin ya ziad neziu, chií rapyba lonií:

—Gua, ¿calo gú?

Chií rapyní:

—Nezri guabiia lo yu, ta donuu gu nan
güen ta cuuequia bni. ¿Ne liilli, calo cheu?

Chií rapyba:

—Zigacza naa, chaa chabiia donu xana
na lon.

Binqui rapy:


—iGua, güendux na lon, guabiiasi
gannuu!

Chí bnazba zeba, chi bidximba lo
xliuba bchímba lon, diza nayuldó ri lon.
Bnazba gubigriglluntiba zellíba guun. Chi
bidximba rapyba lo chélba: “iOi, yoo ta
choldeequynuu bni, purc nilapa rmosdux
nadx lo yu!”.

Chií bnazba bquídyba xcuumba, chiítii
bnazraba zeldeequyraba bni.

Chi bidxinraba lo yu bzullnezba
xcuumba guiquy llurc. Chií bzuloba

cayaamba, biadgaa chélba cabeequy bni.
Ruydídxracraba cayunraba dxín.



Chi bínraba gan bdubin, chií bnazraba
ziaraba. Chi bídxág xman brín, chií rapy
binguiiw lo chélnii:

—Gurin oi, naa chabiia lo guel donu gu
rmosgui bldianin.

Chií rapy chélba:

—Yo, gu guabiia.

Chií bnazba zeba, chi bídximba gumba
lon diza billigdó bldianin, chiípaa rdámba
rníba: “Güendux, laa Dios gucne naa, gratí
xquelaa bldiany.”

Chií bnazba ziaba. Chi bidximba
rapyba lo chélba:

—Oi, guracbeu nilapa rmos bldian
xquelnuu, diza guiabilligdó zubran rial lon.

Chií rapy bingunaa:

—Quixtios Dios, nila gucnanuu laa
Dios gucne laanuu bldian xquelnuu.

